

欽定大清會典事例

欽定大清會典事例卷一千一百十七

八旗都統

田宅

宗室莊田

官兵莊田一

宗室莊田

畝坐落
詳見戶部

○順治元年

諭戶部。我朝定都燕京。期於久遠。凡近京各州縣無主荒田。及前明勲戚駙馬公侯伯內監歿於寇亂者。無主莊田甚多。爾部清釐。如本主尚存。及有子孫存者。量口給予。其餘分給東來諸王勲臣兵丁人等。令各府州縣鄉邨滿漢分居。各理疆界。以杜異日爭端。今年從東先來諸王各官兵丁。及現來在京各部院官。

著先撥給田園。其後至者。再酌量撥給。○又定諸王貝勒貝子公等。准於錦州各設莊一所。蓋州各設莊一所。其額外各莊。悉令退出。○二年題准。給諸王貝勒貝子公等。大莊每所地四百二十畝。至七百二十畝不等。半莊每所地二百四十畝。至三百六十畝不等。園每所地六十畝。至一百二十畝不等。○又題准。分給園地。總管內務府大臣四十八畝。親王管領三十六畝。郡王府管領及各府執事人員。皆給地有差。○又題准。王以下各官所屬壯丁。計口給地三十六畝。停

支口糧○三年

諭京城內外無主園地酌量撥給諸王府。○五年題准親王給園十所。郡王給園七所。每所地一百八十畝。○六年題准襲封王貝勒貝子公等祖父所遺園地除撥給應得之數外其餘地畝不必撤出仍留本家。○又題准凡加封王貝勒貝子公等各照本爵撥給園地。○七年題准公主各給園地三百六十畝。郡主園地一百八十畝。縣主郡君縣君園地一百五十畝。○又題准撥給親王園八所。郡王五所。貝勒四所。貝子三所。公

二所。每所地一百八十畝。嗣後凡初封王貝勒貝子公等。皆照此例撥給。鎮國將軍園地二百四十畝。輔國將軍一百八十畝。奉國將軍一百二十畝。奉恩將軍六十畝。○乾隆三十一年議准。嗣後王公莊頭將伊主田地出典與人者。必伊主先呈明宗人府。由宗人府咨行

盛京戶部後。始准出典。如無宗人府咨文。行知

盛京。即私自典出者。照家奴偷典主人田地例。先將田地給予原主。其買賣及保人等。俱分別治罪。○四十八年

諭嗣後宗室地租被莊頭霸占不行給租者著即呈明戶部代為催辦。○光緒十二年

諭本年順天直隸各屬水災較重小民困苦異常朝廷廩念災區業經賞給米石銀兩以資賑撫所有王公貝勒各府並各京旗莊田著即自行體查災歉情形將如何減收租數之處行知坐落州縣出示曉諭不准莊頭攬頭等將已減之租蒙混舞弊。

官兵莊田

酌畝坐落
詳見戶部

○順治元年定民間無主

田房撥給八旗壯丁每人三十畝。○又議准清

查無主之地安置滿洲莊頭其間無主地與有

主地犬牙相錯。勢必與漢民雜處。不惟今日履畝之難。恐日後爭端易生。莫若先將州縣大小定用地多寡。使滿洲自住一方。而後以查出無主地與有主地互相兌換。務使滿漢界限分明。疆理各別。○二年

諭民間田房。有為旗人指圈。改換他處者。視其田產美惡。速行補給。務令均平。儻瞻顧徇庇。不從公速撥。從重處分。○又定民間墳墓。有在滿洲地內者。許其子孫隨時祭掃。○三年題准。副都統以上官。各給園地一百八十畝。地六十畝。○又議准。直隸民

人田地被圍者。以各州縣連界地畝撥補。其不願往他處者。以未圍之民房地均分居住耕種。○又議准。民間田地撥給滿洲。已經於鄰近地方補還。但廬舍田園。頓非其故。又有遷徙之勞。應照被撥地數。一應錢糧全免一年。其地土房舍。雖未經撥給滿洲。而與近邨被撥之民同居分種。亦照分出地數。將錢糧量免一半。凡故明公侯外戚屯地。既經撥出。其錢糧照數永免。○又四年題准。參領以下官員。各給地六十畝。○又題准。撥給兵丁地畝。有告稱不能耕種者。不准。

○又題准所園地內如有集場仍留給民人以資貿易。○又定嗣後民間田房永停園給至業經撥給之地畝以現在為準嗣後雖增丁不加減丁不退各官雖升遷不加已故降革不退。○又題准各官帶來壯丁給地不敷每佐領下再給十名壯丁地。○又題准去年八旗園地止園一面此內薄地甚多今年東來滿洲無地耕種若以遠處府州縣屯衛故明勳戚等地撥給又恐孤貧者無力運送應於近京府州縣內撥換去年薄地並給予今年東來滿洲其被園之民

以未園州縣屯衛田撥補仍照遷移遠近豁免錢糧。四百里者准免二年。三百里者准免一年。以後無復再動民地。庶滿漢兩便。○六年題准。公侯伯各給園地三百畝。子二百四十畝。男一百八十畝。都統尚書輕車都尉一百二十畝。副都統侍郎騎都尉六十畝。一等待衛護衛參領四十二畝。二等待衛護衛三十畝。三等待衛護衛雲騎尉二十四畝。○又題准。各官致仕者督撫布按總兵給園地三十六畝。道副將參將給園地二十四畝。府州縣遊守等官給園地十八

畝。又題准。新來壯丁。每名給地三十畝。○七年題准。八旗舊壯丁。每名撤出地六畝。撥給新壯丁。○十年題准。圈撥民間房地。永行停止。○十一年議准。滿洲兵丁。雖有分地。每年出征。失耕種之業。往往地土空閒。一遇旱澇。又需部給口糧。且以地瘠難耕。復多陳告。而民地又不便再圈查。令壯丁四名以下。將地土儘數退出。量加錢糧月米。其退出之地。擇其腴者。許令原得瘠地之人更換。餘則盡還民間。在滿洲有錢糧可望。樂於披甲。而又無瘠地之苦。至民間素知

地利亦可不至荒蕪。康熙二年題准。新來佐領給地三十畝。領催給地十八畝。三年奏准。各旗壯丁一百名以上。地畝不堪者。共二萬六千四百五十名。將順天保定河間永平等府屬州縣圈出地畝十三萬二千二百五十晌。分給各旗。每壯丁一名。給地五晌。准令遷移。並差部員旗員會同地方官酌量換給。○六年奏准。各旗撥換地畝。將竣餘賸房地。應交地方官辦理。此後各旗有呈請撥換者。概行禁止。○八年

諭。朕續承

祖宗丕基撫育羣生滿漢軍民原無異視務俾各得其
所乃愜朕心比年以來復將民間房地圍給旗下以致
民生失業衣食無資流離困苦深為可憫嗣後永
行停止其今年所圍房地悉令給還民間爾部速行
曉諭昭朕加惠生民至意至於旗人無地亦難資生
應否以古北等口邊外空地撥給耕種其令貝勒大
臣確議以聞欽此遵

旨議定張家口喜峯口古北口獨石口山海關外各有
曠土如宗室官員及兵丁有願將壯丁地畝退
出取口外閒地耕種者該都統副都統給印文

咨送按丁撥給。○九年議准。喜峯口獨石口外。既無閒地。正紅旗又無赴邊外領地之人。不必撥給。今以古北口外地撥與鑲黃旗。正黃旗。羅文峪外地撥與正白旗。冷口外地撥與鑲白旗。正藍旗。張家口外地撥與鑲紅旗。鑲藍旗。○又題准。官員兵丁地畝。不許越旗交易。其兵丁本身種地。不許全賣。○二十年題准。滿洲新歸旗者。停給園地。○二十三年定。順天等府民地撥給旗下者。將別州縣衛所額外開墾官屯等地補還。其應輸糧課。考成之責。歸受補州縣徵比。

之事。委被撥州縣。○又題。丈量過旗下大臣官員及投充民人溢額地畝。暫留原主名下。需用時再行撥給。奉

旨。田地為民恆產。已經給予者。不便復取其旗下大臣官員既有溢額之地。理宜註冊。俟需用時再行撥給。民地不可輕動。○又

諭。民間田地。久已有旨永停圈撥。其部存地畝。分撥時或不肖人員。藉端擾害百姓。圈占民人良田。以不堪地畝抵換。或地方豪強隱占存部良田。妄指民人地畝撥給。殊為可惡。直隸巡撫可嚴察此等情弊。指名

糾叅從重治罪。○二十四年議准。直隸州縣百姓墾
荒地。停止圈撥。如有各處壯丁及新滿洲應
撥地畝者。將

皇莊並上三旗內務府及八旗禮部光祿寺丈量
所餘地撥給。俟此項地撥完。再行奏

聞。○三十年題准。新滿洲退出地畝。令給民耕種輸
租。○四十五年議准。撥給地畝。自康熙十三年
後。俱係將八旗退出地畝撥給。但春間二三月
內。已經耕種。應停撥給。俟秋成後。始行撥地。其
撥給地畝。移咨內務府奉宸苑轉付八旗司。並

行大興宛平二縣知照。至已給之地。不准更換。其初次應行給地之新滿洲。於八旗餘地內丈給。○五十三年定撥給莊頭地畝。在各屬旗人退還輸租地內勻撥。不得指園民地。○又覆准旗人退還田地。原有二項。一係退還民人當差納糧。永行停園者。一係退還民人承種輸租。應園之時。例令園撥者。今滄州旗人退還田地。係奉

旨永行停園之地。滄州民人耕種。當差納糧已久。若聽園撥。必致失所。應於各屬旗人退還輸租地內。

均勻撥給。此項地畝。仍應停其圈撥。○雍正六年。覆准旗莊地畝冊存內務府及戶部。凡各州縣檢閱原冊。例應申請咨部轉行知照。往返動需歲時。屢據民人控告旗莊強霸不給之由。總因冊案未易清釐。州縣官雖知隱佔情弊。不便懸斷。以致旗莊恣行兼并。應令內務府宗人府八旗都統。將內府大糧莊頭及內府官兵投充當差人等。現在實有地畝。由內務府查明實數。並坐落州縣鄉邨名下地段四至。造具清冊。咨送戶部。其親王以下間散宗室以上莊頭及府

屬官兵投充當差人等地畝。由各府屬佐領管領造四至清冊。覺羅八旗莊頭及官兵投充人等地畝。由該旗造具清冊。咨送戶部。務須一據二本。一留部存案。一由部轉咨直隸總督發布政司。照造清冊。鈐發州縣。與民人糧地清冊一同存儲。嗣後有旗民互爭之案。檢冊查對。不難勘丈訊斷。再此內帶地投充人戶。有隱瞞地畝。亦應徹底清理。一併行文內務府及八旗都統徧行傳示。如有前項隱瞞地畝。以奉

旨之日為始。定限一年。令在該管官處自行首明。照例

免罪。首報地畝。別造清冊。咨送戶部題明。仍著
輸租當差。如過限一年及首報不實。或被告發。
將地入官。嚴加治罪。造送冊籍之官。一併交部
議處。至此項冊籍頒發以後。每年不免有移換
之處。應於每年年終。令兩翼監督將上稅契買
旗地若干。造具清冊二本。彙報戶部咨行各該
處照數註冊。以備查覈。○七年

諭。八旗地畝。原係旗人產業。不准典賣與民。向有定例。
今竟有典賣與民者。但相沿已久。著從寬免其私相
授受之罪。各旗務將典賣與民之地。一一清出。奏請

動支內庫銀照原價贖出。留在各該旗。給限一年。令原業主取贖。如過限不贖。不論本旗及別旗人。准其照原價承買。○十二年題准。八旗地畝。坐落直隸州縣。為數浩繁。片段錯落。非逐細勘丈。無由知其確數。而該佐領下領催人等。貪圖私取租銀。勾連地戶。將餘出地。及絕戶地。隱匿不報。亦有佃戶因無業主取租。乘機隱漏。認為己業者。更有隱匿年久。竟認為墾荒首報者。此非經管人員。不能悉其界址底裏。令八旗都統各委參領一人。於農隙時。會同州縣清丈。所有餘地。及絕戶

地按照肥瘠酌定租數。交地方官徵租。彙解戶部。儻有恃強阻撓勘丈者。理事同知會同地方官審理。嗣後凡有報出絕戶之地。一面報部。一面委官勘明。交地方官徵租。○十三年

諭八旗欺隱餘地。俱令自首免罪。儻仍欺隱不首。一經發覺。加倍治罪。○又議准圍頭牲丁壯丁人等。官給當差房地。例禁典賣。但彼此授受相沿已久。儻不勘明撤回。在旗丁固無以為當差之資。而概行撤回。又恐鄉愚失業。應令逐細查勘。如紅冊內開載之房地。及其餘地。本屬官物。均應撤回。

其紅冊所不載。本為私業。不應強撤。至典賣有紅契白契之別。撤時又有應追價。應治罪。不應治罪之殊。應遣官前往各州縣。照內務府紅冊徹底清釐。仍將地畝數目。四至邨莊造冊四分。一存本州縣。其三分呈戶部。內務府並直隸總督。以備查覈。○乾隆二年奏准。官用旗地。向在入官地內動撥。今入官地畝。已經分給各旗。作為公產。未便再行動用。按直隸有駐防旗人交出在京所受之地。及各莊頭退出之地。又有八旗丈出餘地。並戶絕無人承受之地。嗣後莊園

人等當差官地及奏免給還並各項官用應行補還者統於前項地內動撥至旗人來京當差應得地畝亦在此內撥給。○又奏准凡興工修築動用旗地地方官於興工日將畝數姓名旗分造冊咨送撥補。○三年

諭朕前以旗人生計貧乏者多將八旗入官地立為公產收租解部按旗分給以資養贍此等地內有定鼎之初圍給八旗官兵開除田賦者亦有旗人與百姓自相交易出銀置買仍在州縣納糧者原屬不同若以入官之後一概定為公產不准民贖殊非朕軫念

畿輔黎赤之本懷。嗣後除原圈官地。不准民間置買。外。其旗人自置有糧之地。現在入官者。不論旗民。准照原估價值變賣。將銀交各旗料理生息。分給旗人。俾霑惠澤。○四年

諭。八旗議奏將公產地價贖回民典旗地等語。我朝定鼎之初。將近京地畝撥給旗人。在當日為八旗生計。有不得不然之勢。其時旗人所得地畝。原足以資養贍。嗣因生齒日繁。恆產漸少。又或因事急需。將地漸次典與民間為業。閱年久遠。輾轉相授。已成民產。今欲將從前典出旗地陸續贖回。必須於民全無擾累。

辦理始為妥協。再此項地。官員內尚須扣俸認買。貧乏兵丁。食餉有限。無從措價。勢必至盡歸富戶。富戶即肯周濟親族。亦豈能多為分給。則贖地一事。未必於貧乏旗人有益。可將此旨行文直隸總督。詳悉妥議。欽此。遵。

旨議定。民典旗地。動公項取贖。在百姓不苦於得價還地。實懼其奪回別佃。今地方官於贖地時。詢明現在佃種人姓名。及現出之租數。造冊送直月旗轉傳八旗備案。嗣後無論何人承買。仍令原佃承種。其租銀照冊收取。不得分外需索。至民

人有在旗地內造房立墳者。如已退地。其從前蓋造房屋並墳墓所佔地基。令丈明畝數。照例交租。不許勒令遷移。再民典旗地。不下數百萬畝。典地民人。不下數十萬戶。若一時概令首報。否則治以隱匿官田之律。未免滋擾。按老圈旗地。界址甚明。老圈之內。但有民產。即係私典。應勘明地畝。界址。旗色。佐領。及原業主姓名。將承買公產餘銀。先交地方官取贖。至圈外旗地。或係民人帶地投充。或係旗人自置。其有出典與民者。應俟圈地贖畢。公產尚有餘銀。再訪原贖

之家陸續辦理不必豫期行文稽查又取贖民
典旗地貧乏兵丁既無從措價亦不能多買按
八旗公產及旗退餘存入官等地並此項贖回
民田不下數十萬畝詳查八旗間散人內有正
身情願下鄉種地者上地給予一百畝中地給
予一百五十畝下地給予二百畝令攜家口居
鄉耕種初種之年量給牛種房屋之資○又覆
准八旗於間散另戶中選人安靜居家勤儉者
令下鄉種地不必指定人數亦不必拘定年限
陸續發往下鄉之後仍准揀選當差初下鄉屯

每戶給房四間。每間折銀十兩。令地方官蓋造。每名給牛具籽種口糧等銀百兩。如承買公產人等。有願令子弟下鄉耕種者。亦照此辦理。於公產項下給發。○又覆准。如有旗民互相典賣公產地畝者。將賣地人等嚴行治罪。出給圖記。售賣之該佐領等。交部議處。屯領催莊頭設法典買旗地之民。概行治罪。地畝價銀一併入官。○七年奏准。凡旗人地畝。有無私行典與民人之處。於每歲底。交各該佐領出結呈報都統備案。民人交里長甲長。亦於年終將有無私典旗

地之處。查明出結稟報該州縣轉詳直隸總督存案。如有私典情弊。一經查出。係旗人該佐領即行呈報都統。民人州縣官即行詳報總督。皆照例治罪。地畝及地價。一併入官。如該管各官失於覺察。或經發覺。或被首告。將佐領驍騎校領催州縣官甲長等。一併交部議處。○八年奏准。八旗承買公產地畝人等。有情願赴屯自種者。均給予印信執照。令其呈報該地方官驗看。回旗之日銷毀。如有從前赴屯種地者。各該旗詳細查明。按名補給印信執照。○十一年奏准。

凡民典旗地。不論契典年限。當以十年為率。其在十年以內者。照原典之價。十年以外者。每十年減原價十分之一。五十年以外者。均以半價令原業主取贖。如原業主不願回贖。該旗出示曉諭。准令各旗官兵。照減價具呈認買為業。其扣交地價。均照公產五限之例辦理。○又議准。贖回民典旗地。如原業主無存者。准令原業主之子孫及同胞弟兄。嫡親伯叔及嫡親兄弟之子等回贖。該參領佐領等。出具實係親屬並無捏飾印結。送部辦理。如原業主並無應贖之人。

方准遠族人並異姓人等具呈認買。僅有藉稱原業及原業之嫡屬姓名代贖者。查出將出結之參領佐領等叅處。仍將冒名代贖之人嚴行治罪。○十二年奏准。八旗滿洲蒙古漢軍閒散人及情願告退錢糧下屯種地者。該旗即行保送下屯。後本人不准來京當差。其下屯種地之旗人子弟內有情願來京考試當差者。仍照原議辦理。認買公產地畝人等。子弟有願下屯種地者。一例准令前往。除給予房地外。其應給牛具籽種銀。各該旗委該參領佐領等會同查旗

御史每戶先給銀十分之三。以為料理車腳搬移之費。下存七分。該旗委參領佐領等赴該州縣會同地方官。將牛具籽種估需價值。即行購備。按戶支給。餘賸銀。給予各該戶。以資生計。○十三年奏准。開濬河道。佔用旗地。各該處於興工以前。先行丈明。佔用地畝數目。詳開原業姓名旗色。佐領邨莊段落。造具清冊送部。咨行各該旗。定限半年。查明取結。送部覈對相符者。准其撥補。如逾限不行咨覆。及咨覆不符者。概不准撥補。僥原業內有升遷外任。或撥往外省駐

防者。該旗一面行文該處。一面報戶部扣限辦理。○十四年題准。贖回民典旗地一千八百六十九頃五十八畝。並場園房屋地基各項用銀十九萬八千一百五十五兩有奇。餘贖銀應歸續發接贖地價銀內。為將來贖地之需。

[illegible]

欽定大清會典事例卷一千一百十八

八旗都統

田宅

官兵莊田二

乾隆十六年奏准八旗另戶原准其下屯耕種。今有不肖之徒冒領房屋牛具等銀任意花消。逃回本旗者。令直隸總督查緝逃戶依律治罪。嗣後旗人停其下屯種地。○十八年議准旗人奴僕及開戶人典買旗地定限一年。令其自行首報。官為回贖。如係其主地畝應比民典旗地之例。量為加重。將十年以內者。即照原價減十

分之一。十年以外。減十分之二。以次按年遞減。俟官為回贖後。聽該業主交價認領。或典價本多。一時不能湊交。准其照民典旗地之例。於俸餉內分五限扣交。若將地畝賣給家奴。是其主原不知自顧生計。反得將已棄之產。分限扣俸減價認贖。未免太優。應令交足現銀。方准認領。至旗人將地畝典賣與別姓奴僕。則與奴佔主產有乖名分者不同。應照民典旗地之例。減給原價十分之一。仍按年分遞減。但實係典出者。方准原業主於俸餉內照例分五限扣價認領。

其賣出者即將地贖回入官不准認領亦不准
他人承買此等入官地如原業主無力並無俸
餉可扣不能認贖者均交八旗內務府作為旗
人公產官為收租每於歲終將收過租息數目
彙奏請

賞給貧乏旗人以資養贍仍令該旗及地方官不時
嚴行稽察儻有逾限不行首報或經清釐之後
復違例典賣者一經發覺即撤地入官將業主
售主照例治罪並將失察徇隱之該參領佐領
及地方官交部分別議處其民典旗地嗣後一

併停其召買交與該旗作為公產將所收租息歸入此案於歲終彙奏增給貧乏旗人。十九年議准八旗查送旗人原園及自置地畝內典賣與民者前此清查時未經報出此次共報出一萬四千七百五十九頃有零但此等多係原業主子孫年幼其地畝數目坐落鄉莊典地民人姓名不能記憶是以未經報出直隸各屬除民地外俱係旗人原園地畝若將現納錢糧民地開除挨邨清查即有遺漏旗地可得清楚。二十一年奏准八旗房地在康熙年間典賣者

俱係白契或典或賣真偽難分概不准其回贖
○又議准新滿洲人等來京當差向例於直隸
存退餘絕地內按品級大小分別撥給但領地
有肥瘠之異且侵隱捐租更多滋弊嗣後每畝
酌給租銀一錢五分覈計一名壯丁地每年給
租銀四兩五錢即在直隸徵解部庫旗租銀內
動給

後改為
半折給

○又

諭八旗另記檔案及養子開戶人等俱准其出旗為民
所有本身田產並許帶往○二十二年奏准出旗為
民另記檔案人等凡契買民地並開墾地畝係

伊本身田產應遵

旨准其帶往為業。至於老園並典買八旗地畝。不使將旗地帶入民籍。應查明動用官帑贖回。○又議准直省清查候贖旗地一萬四千五百十八頃。若照旗地旗租。每畝一二錢至三四錢不等。而現在民人承種官租。每畝銀最多者不過錢許。應將候贖地畝。先行發帑照數贖回。交八旗都統等照旗租旗地之例收取租銀。仍先按年解部歸清帑項。○又

諭入官地畝。交與該旗查明原業。原收租數。行令地方

官照數徵收之處。此等地畝。以加惠小民而論。即租額再為輕減。亦無不可。但向來官地租額雖輕。而民佃多不霑實惠。蓋地租一項。既不在官。又不在民。則不肖官吏。轉得視為利藪。該部請照原納租數徵收。自係為杜絕弊端起見。但旗人原收租數。或係市平市斛。而官為收納。勢必用庫平官斛。則租數雖屬相符。而貧民所加。已屬不少。嗣後入官地畝。地方官照原數徵收。著即照原收平斛。令其輸納。庶俾承佃各戶交租不致畸重。而官吏亦不致中飽矣。○二十三年議准。嗣後旗人田地。遇有緩急情願出典者。

呈報該旗佐領註冊。若因價銀較多。情願出賣者。准其不計旗分。通融買賣。至立契時。著赴左右翼稅局上稅。不准私立文契。若有違例隱匿等情。將買賣之人照例治罪。○又議准嗣後

賞種官地。不准典賣與民人。即典賣與旗人。亦所應禁。各州縣官將各該戶現種地畝。責令保長等互相稽查。違禁者。本人名下追價入官。並將原地撤出。報明戶部。仍為旗地。○又議准出旗為民戶內身故絕嗣。犯罪遠徙。並遷移他處者。地畝撤出。其原給印票查銷。飭令該地方官召民

承種輸租。又議准口外所住之人有口內收租者。每年收租時。著該處都統給假親自領取。○又議准屯種官地人等。其地定為三等徵租。上地六分。中地四分。下地三分。俟各旗行知出旗人戶花名到日。即按原撥地畝等次覈明銀數。彙案題報。此項租銀嗣後均歸州縣徵收。給發串票。並於票內註明。

賞給官地字樣。○二十四年題准旗人置買產業一概不許家人及莊頭佃戶人等出名。如有陽奉陰違者。一經查出。即照例治罪。至從前業經借

名置買者。無論在京在屯。俱各呈明本旗另行改名換契。統於接到行知之日。一年為限。如有逾限不行呈明者。事後發覺。一概治罪。○二十年奏准。新滿洲索倫人等。自請留京。及保送留京之後。挑補藍翎侍衛護軍。例得八名壯丁。地。拜唐阿例得五名壯丁。地。此項地畝。如離京稍遠。情願交官徵收者。由部行知地方官。照佃戶交納私租平色徵收。每年十月內。將所收租銀。按名包封。批差解部查收。散給本人收領。○又議准。民人租種旗地。在三年以內者。聽其自

行租種其有長租至三年以外及十餘年者概行禁止如違禁者查出後業主名下追出租價入官租戶名下追出地畝給還本人以示懲儆○二十六年議准旗地長租除奉文後再行違犯者照新例辦理至例前長租者仍照未滿年限例官為給贖○二十八年議准八旗應行入官地內有墳園祭田數在三項以下者准其給還若三項以上除給還三項外餘地悉行入官又原業正身旗人於未經典賣旗地前葬有墳塋行旗確查報部如係三品以上大員其回贖

墳地不得過二頃四品以下職官不得過一頃
兵丁閒散人等不得過五十畝無論已未官贖
俱令交足原價准其子孫世守至出旗為民之
人於典買旗地後葬有墳塋令該州縣確查報
部如係另記檔案曾任職官之人其請留墳地
不得過五十畝兵丁閒散人等不得過三十畝
其餘養子開戶旗下家奴不得過十畝○又

諭上年因八旗回贖旗地積至二萬餘頃之多降旨令

戶部會同內務府及八旗大臣定議以三四十頃安
設莊頭餘俱賞給八旗作為恆產第念此項地畝雖

條旗人世產。但貧民耕種日久。藉以資生。若改歸莊頭。於傭佃農民。未免失業。所有分設莊頭管理之處。宜如何交租。並酌定章程之處。著軍機大臣會同議奏。欽此。遵

旨議定。旗地分佃之花戶姓名。一一填註細冊。按名分給執照。每人照內。將邨名地數。及每畝徵租若干。共銀若干。細數總數。開寫明白。俾愚民易於曉悉。各佃遇有事故。實不能耕種者。准其呈明地方官。另行召佃承種。不得私相授受。其有敢將佃種官田。私行典賣者。照盜賣官地律治罪。

撤出地畝另行招佃。再旗地租息向無寬免之例。應照民地錢糧分數遞減。將應納之租作為十分。如被災十分。准免租銀五分。被災九分。准免租銀四分。被災八分。准免租銀二分。被災七分。准免租銀一分。其六分以下。不作被災分數。儻勘不成災。應暫行緩徵。並分年帶徵之處。分別具題請

旨。至應徵租銀。秋成後一體徵收。解交藩庫。彙總解部交納。其口外荒地。由地方官詳報該道員親勘加結申報總督。由總督咨部除租。○又奏准

旗人將地畝典賣與民人。及旗下家奴者。地畝價銀追繳入官。如本人業經身故。及家產全無之人。該旗查實取結咨部。由部彙題豁免。○二十九年議准。八旗滿洲蒙古漢軍。及下五旗包衣佐領人等。報出絕戶地畝。留給族人及親女。若無族人及親女。有姊妹之甥及親外孫者。將報出之田。七分入官。三分留與親屬。作為祭田。若無此等親屬。即照上三旗包衣人等例。出派家人二名管理。○又奏准。新滿洲來京當差者。其地畝停止丈撥。每畝酌給租銀一錢五分。覈

計一名壯丁地每年應給租銀四兩五錢。即在直隸徵解部庫銀內動給。除已得地後業佃相安。聽其自便外。其有得地後拖欠租銀呈請退地領租者。無論來京先後。仍照每畝一錢五分例按畝給租。儻本身身故子孫在京者。亦給予租銀以資養贍。三十二年議准各旗官贖之產。間有地段錯落。與墳塋不相干涉者。照原定二頃一頃五十畝之數辦理。毋庸分別段落。又議准莊頭官園地畝內。無論新園舊園。其薄鹵沙窪者。概不准退換。三十四年

諭入官旗地。經年久遠。地方官所定租額。大率不能詳
覈。若仍令伊等自行查丈。難保無迴護徇情等弊。著
戶刑二部揀派明幹滿漢司官各四員。別部亦揀派
滿漢各二員。交戶部帶領引見。候朕簡派前往會同
府尹及各該府秉公辦理。○三十五年

諭。向來內務府所屬莊頭。有以地畝薄鹵沙窪呈請退
換者。此等地畝。久經撥定。在莊頭需恩有年。設或地
有肥磽。年有豐歉。即加功墾闢。亦分所當然。乃動輒
藉口呈請。殊屬非是。況農民墾熟之地。任莊頭等換
回。奪民力而坐收其利。於情未為平允。且伊等恃有

此例或與佃戶交好。即退出交官。藉減租數。或覬覦上產。捏報求換種種情弊。皆所不免。嗣後概不准退換。莊頭如果不能充當。著總管內務府大臣查勘確實。另召莊頭。又議准旗人出典旗地契載年分。統以三五年至十年為率。仍遵舊例。概不稅契。十年後聽原業主取贖。如原業主力不能贖。聽典主執業。或行轉典。儻定年限後。仍多載年月。發覺後。追交稅銀。照例治罪。其從前典契內載有二三十年至四五十年者。限於三年內報明各佐領。改典為賣。一體上稅。三十六年議奏八

旗荒蕪田畝酌量墾種並開它泡子奉

旨。此項開它泡子低窪田畝雖荒蕪已久在業戶原不能收藝穫之利但伊等究未免少此產業殊堪軫念著加恩將應行開它之地查明畝數交戶部於官贖旗地及入官地畝內酌量減半抵給俾得耕種取租足資永業以示體恤。○三十七年議准旗人將地畝違例典賣與民人及旗下家奴者所有應追地價若本人業經物故及家產全無之人向止咨部於歲終彙題請豁嗣後此等銀兩若數至五百兩以上者請專案具題以昭慎重。○三十九

年議准向例召買公產旗地按租作等。按等定價。此係將在官地畝散給旗人永為世業。是以租重價輕。至旗人未完官帑。將地畝議價入官抵項。情節本不相同。嗣後八旗官兵人等有以地畝報抵入官者。將原契原價原佃原租各數。由旗查實報部。行文直隸總督。委員履勘相符。即計租定價。統以一分三釐之息為斷。庶完帑不至拮据。而議租亦不能意為輕重。○四十年議准八旗報出絕嗣地畝。在一頃以上。應以七分入官。三分留給祭掃。一頃以下者。概給三

十畝餘地入官。○四十四年

諭近以八旗贖回入官老園地畝。從前俱准八旗官員兵丁認買。後有不肖之徒。有偷行典賣與民人等弊。因改為不准官員兵丁認買。官為取租。今旗人生齒較前有加。此項地畝。僮仍官為取租。必致旗人產業漸少。於伊等生計無益。是以降旨將官為贖出入官老園地畝。仍准官員兵丁分買。交戶部八旗詳悉定議具奏。今復詳為籌畫。八旗人丁浩繁。此內有家奴者固多。而無家奴者亦復不少。其認買地畝。若離京稍近。尚易於取租。僮或在數百里之外。必又紛紛告

假取租不惟徒費資斧。又起民人勒捐之端。其地租能否全得。尚有未定。而每月反將所得錢糧。先行坐扣地價於伊等生計。反無裨益。不如將此項地畝。仍官為取租。將每年所得之租。解送戶部。分給八旗。賞賚兵丁。如此辦理。既不費伊等之力。而錢糧又毫無坐扣。於伊等生計。更為有益。著交戶部八旗均勻分給。仰體朕愛養旗人至意。○四十七年

諭。嗣後八旗爭訟地畝事件。俱由各該旗佐領及該部或步軍統領衙門遞呈。不准在地方官處呈訟。違者從重治罪。著為令。○五十一年議准。留京當差之新

滿洲官兵俟其家眷到京按差使等第撥給地畝由部給租。又議准新滿洲官兵身故並無子嗣而其婦守節者照舊給予地租銀兩身故扣除。如有女未嫁者即與子孫無異應得地租銀兩亦准照數留給。○五十四年

諭直隸各州縣應徵旗租或因水旱不齊致有拖欠自當分別緩徵以紓民力。若果田地鹽鹼拋荒則其地已不能種租從何出。至佃戶逃亡如實因地不能種逃至他所者即應奏請豁免另行召墾何以並不確查妥辦仍復按年徵租試思地已拋荒小民何能交

納。若著落地方官依數賠繳。似此年復一年。伊於何底。各省應徵地丁正項錢糧。如係實欠在民。朕尚加恩豁免。從不令地方官賠繳。焉有因積欠旗租。轉令代為賠納耶。但地方大吏。從前何以未經奏明。恐各州縣有影射虛捏。延宕侵挪等弊。不可不徹底清查。著派侍郎伊齡阿管幹珍前往查辦。如查係實在田畝鹽鹼拋荒。及佃戶逃亡。因而拖欠者。即據時奏聞。候朕降旨酌與豁免。如係地方官誑詞捏飾。希圖影混侵蝕者。即參奏治罪。○五十五年議准旗人置買產業。一概不許家人及莊頭佃戶人等出名。如

有仍前情弊。追價入官。至從前業借家人等名
色置買旗產。無論在京在屯。俱令呈明本旗改
名換契。統以接到行知之日一年為限。赴翼投
稅。如逾限撤地入官。追價治罪。○又奏准八旗
白契置買房地。並老典地畝遺漏納稅者。無論
年分遠近。准其再展限二年。補行納稅。○五十
六年題准民人佃種旗地者。租額平允。業佃相
安。仍照舊承種交租。若因原佃租輕。現有別佃
情願增租。及情願自種者。均由業主自便。所有
從前不許增租奪佃之例。即行停止。儻有刁佃

把持妄控者。仍卽照例治罪。○又題准。凡投充人丁地畝。應照八旗園地例。典賣悉由本主家奴。不得藉稱投充。捐地不交。○五十七年議准。民人租種莊頭園地畝止。准按年交租。該莊頭等毋得豫支。僮仍豫支。許佃戶呈控。如佃戶希圖減省租錢。私行豫交。查出一併治罪。○嘉慶元年議准。旗人指俸餉回贖民典旗地者。其銀著分五年扣交。僮未經扣完。不准轉售。違者治罪。○四年議准。留京新滿洲之官地所得租銀。如係承受祖父所遺。非本身自得之項。身故

後並無子嗣妻女又無承嗣即以所遺租銀移給胞弟如係本身當差分下所得者病故後即行裁汰不准移給○五年奏准民人佃種旗地仍照舊例不許地主奪佃增租○又

諭報部入官地畝議租時輾轉飭查稽延時日而增租定例應以入官之年為始是以每戶租息有積至數年至十數年不等其應交銀數自十兩至百餘兩不等此等入官地畝積年應交地租若令一時併交民力不免拮据所有嘉慶二年以前應徵入官地租其積至二十兩以上者著加恩分兩年帶徵五十兩以

上者分三年帶徵一百兩以上者分五年帶徵其有以議租輕短經該部駁查未定者亦著先照原議租數完納議定後如有加增再行補徵以示體恤而紓民力。六年奏准八旗民人等典買旗地無論旗民俱限一年內自行首報除地畝入官外旗人免追地價民人免追歷年租息如限滿仍有隱匿不報者於旗人名下追償民人名下撤地入官並追其歷年得過租利以息訟端。道光二年諭八旗人等爭控地畝毋得赴地方官衙門呈訴均應親赴部旗或步軍統領衙門呈明辦理地方官亦毋

許率准虛詞詳部。○咸豐二年

諭戶部奏旗民交產擬請量為變通一摺。另片奏奉天旗地仍照舊例辦理等語。向來旗民交產例禁甚嚴。無如日久弊生。或指地借錢。或支使長租。顯避交易之名。陰行典賣之實。此項地畝。從前免納官租。原係體恤旗人生計。今既私相授受。適啟胥役人等訛詐勾串等弊。爭訟繁多。未始不由於此。若仍照舊例禁止。殊屬有名無實。著照該部所請。除奉天一省旗地。盜典盜賣。仍照舊例嚴行查禁外。嗣後坐落順天直隸等處旗地。無論老圈自置。亦無論京旗屯居。及何

項民人俱准互相買賣。照例稅契升科。其從前已賣之田。業主售主均免治罪。○又議准變通旗民交產章程。一。查出私買旗地免追花利。一。清查各項旗地劃除民地。一。民人呈報升科寬予期限。一。帶地投充等弊嚴行杜絕。一。應報升科地畝不准徇隱。一。從前典當旗地改立賣契。一。借名私買旗地改歸買主。一。屯居各項旗人分別辦理。一。補納稅課銀兩。先行解部。一。新升旗產對則酌中定額。一。新賣旗地設法稽查。一。奏銷考成。從嚴覈定。一。每歲錢糧定期解部。一。隨地莊園。

准其並售。一旗產歸旗。照舊納糧。一責成州縣辦理。分別勸懲。○同治二年奏准八旗滿蒙漢置買產業。歸兩翼稅契。不必取其佐領圖記。即由兩翼查據原契底本。給予過契。至龍票產業。情願出賣者。聽其自便。置買者。亦赴翼照例納稅。○又奏准老圈地。原無契紙。令其自行查明畝數。開載四至。及價銀若干。立一白契。赴翼報明。按稅則交納。准其作為契據。均毋庸佐領圖記。以歸簡易。○光緒十五年

諭。嗣後宗室八旗京屯田產。無論老圈自置。永遠不

准賣與民人。如有違例私自買賣者。即行照例懲辦。

欽定大清會典事例卷一千一百十九

八旗都統

田宅

盛京等處官兵莊田
井田改屯地

各省駐防官
牧場草廠

口外牧廠

盛京等處官兵莊田○

國初創業東土。扈從將士。按旗分處。各有定界。繼因歸附益衆。展邊開墾。移兩黃旗於鐵嶺。兩白旗於安平。兩紅旗於石城。兩藍旗所分張義站。靖遠堡地瘠。以大城地與之。○順治五年題准。沙河所以外。錦州以內。八旗官員家丁。每名給

地三十六畝。○又題准。官員莊屯。兩黃旗設於承德縣沙河所。兩白旗設於甯遠州。兩紅旗設於承德縣塔山。兩藍旗設於錦州。○十二年題准。遼陽鐵嶺至山海關。八旗莊地。多有在邊外者。相沿已久。不必遷移。令照舊種住。惟酌量邊界開門。毋誤耕穫。○康熙十二年題准。旗人有墳墓在

盛京。欲從京城遷往就近守護者。若將在京所受地畝退出。准撥給

盛京熟地。不退者。撥給荒地。○十八年議准。奉天

成熟地畝撥給新滿洲耕種恐於民不便今更
定兩便之法奉天所屬東自撫順起西至甯遠
州老屯南自蓋平縣欄石起北至開原縣除
馬廠羊草地外實丈出三十二萬九千四十二
頃三十畝內定為旗地二十七萬六千二十二
頃八十畝新滿洲遷來若撥種豆地每六畝給
種一斗撥種穀米黏米高粱地每六畝給種六
升○十九年議准由京城遷往

盛京當差官兵及安莊人等有將在京地畝退還

願領

盛京地畝者。將彼處旗人墾出餘地。並未墾荒地。酌量撥給。○二十五年題准。錦州鳳凰城等八處荒地。分撥旗民給牛屯墾。每十六丁內二丁承種。餘十四丁。助給口糧農器。○又題准。黑龍江墨爾根地方。由戶部各差官一人監看耕種。墨爾根令索倫達呼爾官兵耕種。黑龍江令盛京官兵墾種。○二十八年議准。嗣後旗民各在本界內墾種。不許旗人越界墾種。以滋爭端。如有覓地餘多。旗民情願墾種者。將地方畝數具

呈

盛京戶部。在各界內聽部丈給。○二十九年議准。墨爾根居住之索倫等。每年耕種官田二千餘晌。今官兵移紮墨爾根。即以此項成熟之田。分給耕種。○三十二年議准。

盛京旗人所種地畝。每年地一晌。徵豆一關。東升草一束。今將地畝丈量。不論何屬之人。俱照八旗十三城所管地界。交與協領城守尉等催追。○雍正四年覆准。

盛京地畝。令奉天將軍府尹戶部侍郎會同差往丈量。地畝大臣將十四城界內。分為十四分旗。

地民地。公同派出賢能官員會同查丈。其
皇莊捕牲人。

三陵屯莊執事人閒散人等。千丁驛站臺丁園丁。戶禮
工三部屯莊官丁。僧道各項人等地畝。率領伊
等該管官公同查丈。務期詳悉清楚。毋致遺漏。
隱匿丈完之日。將丈過地畝數目。造冊送部。儻
有隱匿之處。日後發覺。將查丈官從重治罪。○
又覆准甯古塔船廠等處設立州縣打牲烏拉
令船廠新設知州兼轄管理。其拉林河等處地
畝。不准開墾。交與伯都訥新設知縣嚴行禁止。

○又覆准船廠等處開墾地畝禁止旗民互相
典買○又覆准赫爾素等驛站及各邊地驛站
所有近城之八旗莊屯又甯古塔所有開熟田
地亦如奉天府屬之州縣照每畝三分錢糧例
交納給予印票即令其交納錢糧不許原主侵
占○十一年題准喜峯口駐防兵丁百名將鐵
門關外大屯官地分給每名給地一頃十五畝
七分有奇菜園四分有奇令其耕種照例分別
科則按畝輸租租銀留充兵餉○乾隆元年覆
准口外熱河地方設立驛站營汛官兵皆有撥

給耕種額地。後因滋生日久。遂於額外之地。各自開墾。今悉行文出。除原額外。所有餘地。應令按畝納糧。至古北口。乃邊關重鎮。駐防兵丁。攜家戍守。沿邊瘠地。皆係自出己力。逐漸開墾。出息無多。丈出之地。應悉賞給。免其輸糧。又各蒙古丈出餘地。若令納糧。恐不敷養贍。又內務府當差鷹手。捕牲人。宰匠等。散處口外。皆有開荒地畝。伊等原在內務府當差。不便令其一例納糧。均將現在丈出餘地。註冊。亦免其納糧。嗣後如再有開墾。即照例按畝徵輸。○二年。覆准黑

龍江呼蘭地方設立官莊令

盛京將軍於八旗開戶人內選能種地壯丁四百名。攜帶家口前往開墾。每壯丁一名撥給地六十畝。蓋給草房二間。每十丁合編一莊。共設官莊四十所。每十莊設領催一名。共設領催四名。管理由

盛京遷移家口。每名給碾磨銀五兩。其家口每人給整備行裝銀二兩。沿途各給口糧。撥驛站車送至吉林。由吉林撥運糧船。仍給口糧。送至呼蘭。初至呼蘭。每丁給冬夏衣幅。其家大口每月

給糧二斗四升九合。小口半之。每開墾地六畝。給籽種二斗。每莊給牛六隻。如有倒斃。動支庫存牛價銀買補。再呼蘭安駐兵丁。各有墾種地畝。不能代官莊人等助墾。於每莊額給牛六隻外。各多給牛二隻。令全出己力墾種。其牛如有倒斃。毋庸補給。每半月給牛料糧一石二斗。其家口糧給一年。牛料糧給兩月。皆停止。每丁所受之地。歲納租細糧三十石。第一年免輸。第二年交半。第三年全納。再委撥官兵採木造屋。每間各給飯銀四兩。動支庫銀倉糧。令該將軍等

分析歸款奏銷。俟安設官莊事竣。令

盛京將軍再於八旗開戶人內。詢明有願往呼蘭
墾種官地之人。應增設官莊若干。再議具奏。○
六年議准。呼蘭地方寬衍。可設官莊之處尚多。
應將前設四十官莊之間。丁一百三十八名內。
選擇五十名。增設官莊五所。撥地開墾。每名給
地六十畝。及牛種器具口糧。並每年應納糧數。
均照二年之例。但選撥官莊間丁。不比他處移
住。其每丁應給房二間。每間給銀四兩五錢。令
其自行蓋造。毋庸別撥兵丁。其餘丁備補各莊。

空缺○七年議准呼蘭左近溫得亭山並都爾圖地方土性肥饒水草佳美應將

盛京將軍所送願墾官地開戶人內選能種地壯丁五十名增設官莊五所撥地開墾其資送及撥給田房牛種器具衣帽口糧並應納糧數均照二年之例再六年增設官莊五所合之此次所增官莊五所已足十莊之數亦照例增設領催一名管理○三十年議准

盛京莊頭家奴盜賣伊主田產至五十畝者照子孫盜賣祖遺祭田例發邊遠充軍不及五十畝

者。照盜賣官地例治罪。其誘賣及串通中保人等。俱與盜賣之人同罪。田地仍給原主。價值入官。若姦黨藉端行詐。照控告不實律治罪。嗣後八旗官員遇有典賣

盛京田地者。先於該都統衙門具呈報明。俟都統轉行

盛京戶部查辦。○三十一年

諭戶部議覆侍郎英廉請丈出盛京旗地餘地。准令無地兵丁閒散人等認買一摺。原為旗民生計起見。但此等無地人戶。貧富不齊。其有餘者置產必多。而無

力之家未必能一律承買。恐於伊等資計仍無實濟。因念該處冬圍兵丁一切鞶馬之需。不無拮据。著將此項餘地內酌派徵租。每年備賞資裝。於該兵等殊有裨益。其應撥用若干。及所餘地畝除撥補隨缺各項外。或可一體徵租存貯動撥。或聽旗人認買。毋致有名無實之處。新柱現在出差盛京。著會同該將軍府尹等確勘該地實在情形。妥協定議具奏。欽此。遵旨議定。現在丈出餘地四十一萬八百餘晌。加之移紮伊犁兵隨缺地七千晌。二共四十一萬七千八百餘晌。內除應撥隨缺官員地一萬六千九百

晌兵丁地四萬八千五百七晌。水衝沙壓學田
水手公產等項地三萬九千九百餘晌。其餘地
畝共三十一萬二千四百晌有奇。應一併入官。
即令原種之旗民照數納租承種。以裨生計。並
按各處地畝之高下肥瘠。糧額之等差。照依上
中下三則分別覈計。每晌應徵租銀自四錢八
分至二錢四分不等。折中每晌租銀三錢六分。
約計每年共徵租銀十一萬四百兩有奇。冬園
兵丁

恩賞銀兩。即於此項內撥給。餘銀解交

盛京戶部另款存儲聽候撥用。○三十二年議准。吉林伊勒們等處官地硤瘠。可將無力壯丁。分移瑪延地方撥荒開墾。○三十四年議准。

盛京旗人出租地畝。統以三年為限。違者照長租例辦理。○三十七年。

諭盛京馬甲之隨缺地畝。皆為養贍該處滿洲而設。經年既久。生齒日繁。若將伊等應得錢糧地畝裁汰。入官。有害伊等生計。此項地畝。著該處將軍酌添步甲。或添養育兵。俾衆人均霑實惠。以示朕體恤滿洲至意。○四十年議准。岫巖城五塊石各兵丁牧馬官廠。

內有山東流來民人偷墾地畝私造房間不必拆毀令其入官仍著伊等居住耕種納租並交納地畝租銀米石若有不願耕種者即行另招耕種○四十六年

諭戶部議覆索諾木策凌等查丈流民私墾地畝仍照山東科則定賦一摺自應如此辦理流民私墾地畝於該處滿洲生計大有妨礙是以照內地賦則酌增以杜流民佔種之弊且撤出地畝並可令滿洲耕種不特於旗人生計有益並可習種地之勞不忘舊俗原非為加賦起見至吉林與奉天接壤地糧自應盡

一。今據戶部查奏吉林所定額賦。又係照直隸辦理。與奉天查照山東科則者互異。是和隆武專似為言利起見。殊非均平額賦加惠旗人之意。所有吉林地畝錢糧應收賦則。著交和隆武會同索諾木策凌詳悉熟籌。酌中畫一定額。妥議具奏。欽此。遵

旨議定。四十二年以前。吉林陳民耕種地畝。照奉天陳民例。分為上中下三等。銀米各半徵收。以後續行查出私開地畝。亦照奉天查出流民地畝。加增糧額之例。銀米並徵。○又

諭。盛京吉林民人私墾地畝。續經查出者。每畝歲徵銀

八分。仍在旗倉內納米二升六合五勺五抄。以懲匿報之弊。著為令。○五十九年議准。吉林無力壯丁。開墾地畝。耕種有年。而缺額名下糧石。俱係壯丁代完。倍形拮据。嗣後應將附近正紅鑲紅兩旗馬廠地方。令無力壯丁募民開墾。以抵糧額。各省駐防官兵莊田。○順治二年

諭近來土賊竊發。民不聊生。如直隸順德府。山東濟南府。德州。臨清州。江北徐州。山西潞安府。平陽府。蒲州。八處。著滿洲統兵駐紮。務期勦撫得宜。以安百姓。以上八處駐紮滿兵者。給以無主房地。其故明公侯伯

駙馬太監田莊。察明量給原主外。餘給滿洲兵丁。○
四年題准。江甯駐防旗員。給園地百八十畝。至
六十畝不等。西安駐防旗員。給園地二百四十
畝。至二百十五畝不等。○又定。浙江省駐防官
兵。不給田。俸餉照經制支領。○五年題准。各省
駐防官兵家口。半攜去者。具在京園地半撤。全
攜去者。全撤。○六年題准。外省駐防旗員。初任
未經撥給園地者。准令撥給。具加級升任者。不
復增給。凡應給地六十畝以下者。戶部照例撥
給。六十畝以上者。奏請撥給。○七年題准。駐防

官兵量給園地。兵及壯丁。每名給地三十畝。臨清州。太原府。以無主地並官地撥給。保定府。河間府。滄州。以八旗退出地撥給。○康熙三十一年題准。將山西省陽曲。太原二邑所屬享堂等六屯地。改撥給該省駐防官兵。○三十二年議准。各省駐防之八旗官兵。均在所住處給予地畝。○乾隆二十一年

諭。嗣後駐防兵丁。准其在外置產。病故後。即着在該處埋葬。其寡妻停止送京。但各處情形不同。兵丁內有無力置地營葬者。著該將軍都統等酌動公項。置買

地畝。以為無力置地窮兵公葬之用。○又奏准各處

駐防官兵直隸省山海關等八處給地三百四

十五畝。張家口給八十畝。察哈爾右衛給一百

五十畝。獨石口給三十三畝。山東省青州給二

百六十畝。德州給四十畝。河南省給三十九畝。

山西省太原府給四十五畝。綏遠城撥給土默

特地二十一頃九十畝。右衛給二百八畝。江南

省京口給山地二頃七畝。浙江省杭州給一百

八十九畝。乍浦給五十畝。福建省給二百十六

畝。湖北省給一百十六畝。陝西省西安給二頃

十畝。甘肅省涼州給二頃二十五畝。甯夏給九頃六十畝。四川省給二十頃。均作為駐防官兵營葬墳地。○三十九年

諭伊犁土田肥潤。如敷多人耕作。莫若令滿洲兵丁分種。則伊等既得效力於農。又可藉以養贍。著該處將軍查明地畝。俟滿兵到齊住定後。酌量分畛耕種。○

嘉慶九年奉

旨。伊犁駐防滿洲兵丁。生齒日繁。松筠相度屯地疏濬。泉源設法製備器具。借給牛隻耕種。兩年以來。試有成效。茲該將軍猶恐滿洲兵丁久而生懈。請照錫伯

營屯種之例。按名分給地畝。各令自耕。永為世業。係為旗人生計起見。其事本屬可行。惟是新疆重地。設兵駐防。武備最為緊要。此項田畝。即分給官兵。止可令其轉交閒散。餘丁代為耕種。不當令官兵親身力作。有妨操練。轉致技藝日就生疏。至閒散餘丁內。老弱殘病者。豈能令其耕作。勢必仍需壯丁幫助。其漢仗強健者。一概驅之南畝。自必不能專心練習武藝。即充數入伍。亦難資得力。殊非慎重邊陲之道。此事惟在該將軍妥協經理。既使旗人有田可耕。永資養贍。而於新疆重鎮設兵防守事宜。無少窒礙。始為盡

旨。慶桂等會同松筠議覆伊犁將軍晉昌酌定屯田事宜一摺。該處從前八旗分種之田。若仍令其通力合作。伊等視公產不如私業。勤惰不齊。不足以專責成。自應將此項田一萬餘畝分給八旗。俾各專心耕種。永資樂利。其原奏所稱如有人力不敷。准其佃人耕種計畝收租一節。日久恐滋流弊。應如慶桂等所議。責令八旗閒散餘丁自行耕種。既敷養贍。又免游惰。

於駐防旗人教養之道大有裨益。至松筠另片所奏。伊前在伊犁將軍任內。曾於伊犁河北岸附近地方築堡造屋。閒散壯丁按堡授田。教之樹畜。並令三時務農。冬時操演。所辦已將次第舉行。費用亦有款可支。毋須另給。松筠在彼年久。熟悉情形。現在該處有原派承辦員弁。著晉昌遵照所奏章程認真妥辦。以收實效。○道光九年

諭。雙城堡原定移駐京旗三千戶。改為移駐一千戶。將所餘二千戶京旗地畝四萬晌。添給一千戶京旗。每戶酌添給地十五晌。共添地一萬五千晌。本地旗丁

三千戶。每戶亦酌添給地八晌。三畝三分餘。共添地二萬五千晌。計京旗旗丁共添地四萬晌。每戶京旗可得地三十五晌。每戶旗丁可得地十八晌。三畝三分餘。通堡地畝九萬晌。均予撥竣。

井田改屯地。○雍正二年。覆准內務府餘地共一千六百餘頃。挖欠錢糧人等所交地共二千六百餘頃。以二百餘頃作為井田。將無產業之滿洲蒙古漢軍共選一百戶前往耕種。每戶授田百畝。凡八百畝為私田。百畝為公田。共力同養公田。委戶部司官勘丈。設立邨莊。蓋土房四

百閒。給予種地人口糧耕牛籽種農具。以便耕種。並於八旗廢官內。揀選二人前往管理。○五年奉

旨。旗人犯枷責治罪。革退官兵。並無恆產。令於京城附近直隸地方耕種井田。○又奉

旨。井田地方。止有塞德等管理。著於彼處再設驍騎校四人。領催八人。料理事務。其俸餉升轉。悉照在京驍騎校領催之例。○乾隆元年奏准。設立井田以來。所有承種之一百八十戶。緣事咨回者。已有九十餘戶。循環頂補。大都皆不能服田力穡之人。行

之未見成效。行令確查實力耕種。安插得所者。改為屯戶。按畝納糧。於附近州縣倉內收存備用。原設領催改為屯長。約束屯戶。聽該處防禦管轄。原設驍騎校撤回該旗補用。不能力穡之戶。咨回本旗。停其撥補。原領田房。交州縣賃耕。取租解部。○又議准。改屯人戶故後有子孫者。自應頂補。儻無子寡婦。情願守節。並無親屬可依者。留地四十畝養贍。即令本屯人代種完糧。身後仍將地畝入官召種。再各邨向設鄉長一名。專供督責井戶農務交糧。稽查逃盜賭博等

事。仍留供役。果能勤慎。准其拔補屯長。○二十二年議准。出旗漢軍各戶領種井田者。應將此項地畝。另立名目。稱為

賞種官地。令各州縣查對原撥地數。勘明邨莊段落。四至。填給印照。註明

賞種官地字樣。交本人收執。其應納之糧。仍照定額。每畝徵穀一斗。

牧馬草廠。○

國初於

畿輔設牧廠。鑲黃旗坐落武清縣寶坻縣。東自唐

畦西至陳林莊七十里。南自張家莊北至上馬
臺几十里。正黃旗坐落天津府。西北自俞家莊
東北至小稍子口三十五里。西南自孫家莊東
南至狄家莊四十七里。正白旗坐落天津府。東
自好字沽西至白家莊四十二里。南自城兒上
北至清溝六十五里。正紅旗坐落甕山十五頃。
盧溝橋西高陵二十七頃六十畝。鑲白旗坐落
通州二十四頃八十四畝。鑲紅旗坐落順義縣
天主馬房邨三十五頃二十八畝。盧溝橋四頃
八十畝。正藍旗坐落豐臺王蘭等莊東西三十

果南北五十里。鑲藍旗坐落草橋十里。廊房八里。○順治二年題准。

御馬館主貝勒貝子等馬館。各按本旗地方牧養。○又題准。天師庵草場。設廠尉筆帖式及書役甲兵巡守。○又題准。近京廢地均撥給壯丁墾種。如撥給有餘。方准為牧廠。○六年題准。順義清河郭縣沙河盧溝橋五處荒地一千四百十八頃四十四畝。潞河沙河清河桑乾河兩岸各長五里闊三里。皆令丈作馬廠。○又題准。嗣後棄地作為牧廠。永行停止。如沙地不堪耕種者。

仍准牧馬。○十一年題准給親王牧廠方八里。郡王牧廠方四里。○十二年覆准親王牧馬廠方二里。郡王牧馬廠方一里。額外多占者查出撥給新壯丁。○康熙元年題准天師庵草廠歸併崇文門部員管理其原設官役甲兵皆裁。○三十九年議准天津等十二州縣衛所牧馬廠地派都統會同直隸巡撫查明餘地交與地方官招墾起科。東翼四旗丈出一萬二百六十一頃有奇。西翼四旗丈出一萬一千三百七頃七十二畝。○雍正二年議准八旗存留牧廠並牧

廠餘地。差八旗都統一人。率戶部賢能官二人。每旗賢能官一人。令直隸總督委道員一人。公同查勘。其有可以耕種者。交與地方官招民墾種。其不堪耕種之處。仍交八旗作為牧廠。○乾隆二十一年議准。清丈直隸馬廠地。給民為永業。改名。

恩賞官地。天津靜海青滄鹽山豐潤寶坻甯河大城。

文安任邱新安。

後改鄉

武清十三州縣。查文得十

一萬五千一百二十六頃有奇。○二十二年議准。天津等州縣覆丈實得十萬一千一百二十

四項有奇。除已經墾種升科外。其已墾未升科地一萬五千六百五十二項有奇。應按畝酌定科則。天津靜海青滄鹽山武清寶坻任邱新安後改九州縣地。分為上中下三等。每畝徵銀五分至一二分不等。甯河縣葦草地分為二等。每畝徵銀三分一分不等。文安縣地。每畝徵銀五分五釐。大城縣地。每畝徵銀五分五釐九毫有奇。其餘未墾荒地。俟招墾成熟之後。按則起科。又豐潤縣原報墾地三千五百餘頃。係海濱斥鹵不能耕治。仍應歸於未墾荒地項下。如有民

人願墾為業者。照河泊葦草地例起科。

口外牧廠。○原定。鑲黃正白。鑲白正藍。四旗牧廠。在張家口北一百里。控果羅鄂博岡。東西距一百四十里。南北距一百五十里。東至鑲藍旗牧廠界九十里。西至正黃旗牧廠界五十里。南至宣化府邊界四十里。北至鑲黃旗察哈爾界一百十里。東南至鑲藍旗牧廠界九十五里。西南至邊界五十里。東北至太僕寺左翼牧廠界六十里。西北至鑲黃旗察哈爾界一百九十里。正黃。正紅。鑲紅。鑲藍。四旗牧廠。在張家口西北。

二百里。諾莫潭博羅山東西距一百三十里。南
北距二百五十里。東至鑲黃旗牧廠界六十里。
西至正黃旗察哈爾界七十里。南至邊界一百
三十里。北至正黃旗察哈爾界一百二十里。東
南至鑲黃旗牧廠界八十里。西南至正黃旗察
哈爾界九十里。東北至鑲黃旗察哈爾界一百
十里。西北至正黃旗察哈爾界一百里。○乾隆
三十七年議准。殺虎口外馬廠地。禁止私開。原
以防侵越察哈爾游牧地界。今民人等所開地
畝。實係各王公馬廠界內。現在該王公馬廠內

牲畜日稀。無須多餘地畝。是前項廠地。本屬曠野。與其嚴行飭禁。坐成無用之區。不若准其耕種。作為有用之土。所有已經墾熟。輔國公恆祿地畝三百餘頃。該撫等查明確數。在各該佃名下。每畝徵銀一分四釐。由甯遠廳通判衙門報部撥用。仍令佃戶向各業主名下。按畝交租。編造戶口清冊送部。此外毋得再行私開。○三十年奏准。輔國公甯陞額名下。口外馬廠。係蒙古招同傭工貧民。墾種成熟一百餘頃。雖呈報在後。而墾熟在先。據察哈爾都統會同山西巡

撫委員確勘。前項牧地陸續開墾。在飭禁以前。早已成熟。應照上年恆祿牧地辦理。○四十年奏准。查丈輔國公甯陞額等家牧廠成熟地一百一頃一十三畝。照例升科。○四十六年議准。口外牧廠遼闊。近年來王公大臣等收放牲畜漸稀。而流寓小民在該地方居住者漸成邨落。不若准其耕種。作為有收之土。照例升科。所有和碩莊親王塔拉庫爾布地方牧廠一處。既據察哈爾都統山西巡撫查勘所墾地畝。實與游牧無妨。即照恆祿等家開墾馬廠空閒地畝之

例一律升科。和碩禮親王亦呈報現有民人私墾。令該都統等查明與游牧無礙。一併辦理。嗣後各旗王公大臣等口外牧廠。實與游牧毗連處所。或有蒙古與民人私行開墾耕種者。令該地方官仍照前實力稽查。嚴行飭禁。○四十八年議准。和碩莊親王牧廠空閒地畝。續墾得熟地三十二頃七十八畝有奇。照例升科。未墾地畝。速飭招民開墾。以盡地利。○五十年議准。和碩莊親王牧廠空閒地畝。續墾得八十三頃九十一畝有奇。照例升科。○又奏准。宗室德齊奉

恩將軍恆林廠地坐落殺虎口阿布達里地方
三百五十一頃十一畝有奇。並丈出民人私墾
地一百四十頃八十四畝。均照數一併入官。按
則升科。仍於游牧毗連之處。剗溝砌石為界。○
五十二年議准。和碩莊親王牧廠界內餘地頗
廣。均屬山坡。從前積水停蓄。不能開墾。近年雨
水稀少。勘與游牧無妨。可墾地六百三十五頃
三十四畝有奇。俟試種成熟。准於五十五年照
例升科。此外荒坡澗側尚有地四百餘頃。俟認
墾有人。查丈升科。○又議准。和碩禮親王胡魯

蘇臺牧廠地。兌換西爾濟圖地方。除砂磧不毛
難以開墾外。實大地一千三百三十二頃三十
九畝有奇。照例升科。○嘉慶十三年議准。和碩
莊親王牧廠空閒地畝。續墾得六百五十一頃
八畝有奇。照例升科。